

《天台智者大師發願文》

<前言>

夫欲念誦，滅罪障、助菩提，應須發願。

<正文>

甲一、歸敬儀

先淨三業，十指合掌，面向諸佛，口陳辭句，作如是言：

弟子比丘某甲(餘眾各准此稱名)，稽首和南，一心歸命盡十方三世一切諸佛；尊法、般若、十二部經真淨妙法；諸大菩薩摩訶薩眾、諸賢聖僧，常住三寶。

甲二、正申願文 三

乙一、總說

唯願神力慈悲護念，願當證知。以此念誦善根功德，專用莊嚴四恩三有，盡十方法界一切眾生。

乙二、別明 三

丙一、破惡生善願 三

丁一、破惡

願共法界諸眾生等，從無始已來，至於今日，昏沈倒惑；六根、三業造一切鄣道之罪。若麤若細，齊佛所知，一時消滅。

生生世世，永離地獄、餓鬼、畜生身。永離女人身，永離邊地、下賤八難身。

丁二、生善

願共法界諸眾生等，若於此生、若於餘生，常值善知識，常聞無上大乘正法。

丙二、成就法身願 三

丁一、悟圓理 三

戊一、涅槃寂滅

即於此身，悟解常住佛性大涅槃海，一切諸法本來寂滅。

戊二、菩提覺法

具大菩提，了達根塵能所，一念起心，具一切法，百界三千，空、假、中，即法界印，不可思議。心、佛、眾生三無差別。

丁二、發圓行 三

戊一、明總相

體權、識實，發大菩提心，上求下化。拔生死苦，與究竟樂。

戊二、能觀智

修牢強精進四種三昧，只不思議一觀三觀，觀不思議一諦三諦，觀諦冥一。

戊三、所觀境

即四魔、三障，歷緣對境，以妙十法成圓乘。

丁三、證圓果 三

戊一、見道

行解更資，心心明寂，發真中道，開佛知見。

心心現前，所有慧身，不由佗悟，自然流入薩婆若海。住無生忍，具大智慧，成摩訶衍。

戊二、功德 三

己一、大智

通達漸頓諸教，破一微塵，出大千經卷。恒沙佛法，一心中曉。

己二、大悲

覺佛慈悲，無諸慳悞，說於止觀，遍施一切。

開門傾藏，捨如意珠，理即、名字、觀行、相似、分真、究竟，圓伊三點，不縱不橫。

正法大城，金剛寶藏，一切佛法，自行化他，一生有辦。

戊三、成佛

設未明了，非因之因。從因感果，不果之果，獲勝果報。

丙三、往生淨土願 三

丁一、臨終加持 三

戊一、臨終無倒

願共法界諸眾生等，臨命終時，七日之前，自知時節，心不顛倒，心不錯亂，心不共念¹。

身心無諸苦痛，跏趺正念，身心安樂。入深三昧，見十方佛。

戊二、諸聖攝受

願彌陀世尊、三世諸佛；觀音、勢至、諸大菩薩，一切聖眾，不捨本誓，悉現在前。

同時放大光明，照觸身心，所有罪障，一時消滅。諸根豁然，深入知見。以大神力，攝受身心，授金色手，摩頂接引。

戊三、乘願往生

歡喜踊躍，乘佛願力，坐金剛臺，隨從如來聖眾，於一念頃，上品上生西方阿彌陀佛極樂世界，金蓮化生。

丁二、淨土功深 三

戊一、契證法性

悟入無生寂滅諸忍，超登上地，獲六神通。住首楞嚴，不動法性。

戊二、滿普賢行 三

己一、上求佛道 三

庚一、福德資糧

於一念頃，遊歷十方，奉事三世一切諸佛。一一佛前，悉有我身

¹ 私按：“共念”或者是“異念”、“妄念”之誤，在此存疑。

修諸供養。

庚二、智慧資糧

聞法受記，一時普能受持三世如來甚深法海。即自明解，不由佗悟。

大理、大願、大莊嚴、大智斷、大遍知、大道、大用、大權實、大利益、大無住。諸佛所有一切波羅蜜行，一時修習。

庚三、福慧圓滿

與文殊、普賢等諸大士為伴侶，具足一切諸菩薩無量無邊廣大行願，得諸大陀羅尼門、諸三昧門。

己二、下化眾生 =

庚一、入微塵國

普知諸佛剎，嚴淨佛國。於剎那頃，普於十方一切微塵道中，成等正覺，轉大法輪，度脫眾生。

庚二、轉大法輪

無緣慈悲，普覆法界。不動真際，普入三世，度脫一切眾生。或作佛身，施權實。或為九界像，對揚漸頓、請轉漸頓、弘通漸頓。

三輪攝化，攝化無窮。同虛空遍界，而作佛事。

從本垂迹，攝迹還本。本迹雖殊，不思議一。

甲三、結歸秘藏

自佗行圓，常住秘藏。法界怨親，同斯願海。